

5. Akt - Im Esszimmer (2. Mordanschlag, 2. Mord)

5.1. Unsicherheit

Alle Gäste sitzen wieder so, wie am Ende des 3. Aktes. Agi steht noch bei der Türe. Schweigen, entsetzte Gesichter. Der Sturm tobt nun noch heftiger (TON 10).

- 5.1.1. *Sasa (bricht das Schweigen - sieht Polly an):* Das hed sie jetzt devoo, dass sie ehri Nase überall muess inestecke ...
- 5.1.2. *Polly:* ... oder devoo, dass sie zo Gonschte vo ehrer Karriere anderi met ehrne Ellboge usebugsiert hed (*schaut Sasa an*) ...
- 5.1.3. *Susi:* ... es schtemmt (*sieht Agi an*), dass sie Freud g'ha hed, d'Karriere vo anderne kapott z'mache!
- 5.1.4. *Agi (giftig zu Susi):* ... jo, sie hed meischerhaft chönne, anderi nor met Worte fertig mache.
- 5.1.5. *Fridy:* Hörid jetzt auf met dem onsennige G'schnorr. Mer müend drengend d'Polizei lo choo.
- 5.1.6. *Lisi (kommt auch dazu und unterbricht):* ... d'Maria esch ermordet worde. Ech cha's no ned bewiise, aber - ech danke, dass sie met Arsen vergeftet worde esch.
- 5.1.7. *Isidora:* I dem Fall muss sofort d'Polizei alarmiert werde.
- 5.1.8. *Fridy:* Jo, ech mache das, Polly, wo esch's Telifon?
- 5.1.9. *Polly:* Im Büro, em nächschte Zemmer rächts.

5.2. Totaler Stromausfall

- 5.2.1. *Fridy (will gehen. (TON 11 In diesem Moment gibt es en gewaltigen Blitz und Donner, alle Lichter erlöschen - totaler Stromausfall):* Verdammt, ech g'sehne nüüt meh.
- 5.2.2. ---> **Absolute Dunkelheit** ---Allgemeine Unruhe
- Was esch denn los!
 - Zündet 's Liecht aa!
 - Hilfe! • Oh jeh! • No es Onglück? • usw. ...
- 5.2.3. *Tino (hat eine Kerze angezündet):* Do send Zündhölzli. Zündet d'Kerze aa! (*man zündet alle Kerzen an.*) *Fridy geht mit einer Kerze hinaus.*
- 5.2.4. *Polly:* Set 20 Jahr hed's kei settig's G'wetter meh gäh.
- 5.2.5. *Lisi:* Was meinsch, Susi, wie lange werd das G'wetter no duure.
- 5.2.6. *Daniela (spöttisch):* Das cha oisi Wätterfee chuum säge. Sie sctohd jetzt jo ned of em Dach vom Fernsehhuus vor de laufende Kamera.
- 5.2.7. *Susi:* Schpöttle du nor, Daniela. Mech kännt mer wenigstchens vom Fernsehen, im Gägesatz zo ...
- 5.2.8. *Isidora (schroff):* Mer händ ernschteri Sache z'bespräche, als eurem eifältige Geplänkel zuez'lose.